

Date – 05/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Tukin dar 7 atanga Sinlung Hills Council inthlanna bial 12 a polling station 38 a vote thlak chu buaina awm lo leh muanawm taka zawh fel a ni.
2. Chief Minister Pu Lalduhoma chuan Aizawl district Settlement pisa chu mipuite mamawhna avangin Aizawl North leh Aizawl South ah then a ni dawn a ni, a ti.
3. November ni 25 atanga December ni 20 thleng Parliament thlasik thutkhawm neih a ni dawn.
4. President Draupadi Murmu-i chuan India chu Dhamma malsawmna ram ani a ti.

<><><>

SHC POLLS

Tukin dar 7 atanga Sinlung Hills Council inthlanna bial 12 a polling station 38 a vote thlak chu buaina awm lo leh muanawm taka zawh fel a ni.

Inthlan buaipuitu state election commission atanga thu dawn danin vawiina Sinlung Hills Council inthlan vote thlakah hian vote nei mi 23,789-te'n candidate 49-te dinhmun tur an rel fel nghal a. Vote tla hi za zela 70 bawr vel ni tura chhut a ni a. He chanchinthar buatsaih a nih lai hian Sakawrdai-1 leh Mauchar polling station-ah vote thlak mek a la ni a, heti hian vote tla zat hi za zela 65 point 98 a tling tawh a. Kum 2019 a Sinlung Hills Council inthlan hmasak zawkah khan vote tla za zela 72 point 24 a ni. Vote tla-te hi zanin hian chhiar zui nghal tur a ni a. Bial tina bial hmunpui berah chhiarin bial hmunpui-a ballot bawm a thlen kim hunah zel chhiar tan a ni ang a. Zan rei lamah chuan result hriat kim theih beisei a ni.

Mizoram State Election Commission Secretary Pu K. Laldingliana chuan Sinlung Hills Council inthlan chu tluang taka neih zawh a nih tak thu a sawi a.

Mizoram State Election Secretary chuan inthlan hi tukin dar 7 a neih tan a nih thu sawiin critical polling station-ah te pawh buaina leh harsatna thleng a awm loh thu a sawi a, vote tla pawh an beisei ang taka a tlak that thu leh za a 70% chung lam a tlak ngei a beisei thu a sawi. Inthlanna felfai leh maunawm tak neih a nih avangin he inthlana duty zawng zawngte, mipuite leh political party tinte lakah State Election Commission chuan lawmthu a sawi a ni, a ti.

<><><>

ARMS WRESTLERS

Sports Minister Pu Lalnginglova Hmar chuan kumin kum tawp lamah hian Mizoram khawvel pum huap ban-elh intihsiakna a thlen dawn thu vawiin khan a sawi.

Minister hian October thla a Asian Arm Wrestling International Cup a Mizo ban-elh chakte'n tangkapui an hlawh chhuahte lawmpuina a buatsaih a. Hetah hian Mizoram kum tawpah international level arm wrestling inelna a thlen tur thu a puang a. Kumin December thla-ah Aizawl-ah ngei Pro Panja Mega Match Mizoram tih inelna huaihawt a ni dawn a ti a. Hetah hian khawvel huap ban-elh chakte lo kalin, Mizo ban-elh chakte nen an inhmachhawn tur thu a sawi a ni. Mumbai a October 19 atanga 26 chhunga ban-elh inelna neihah hian Mizoram atangin Denic Lalruattluanga chuan senior mipa kg 80 huangah gold medal a la a. Benjamin Lalawmpuia'n senior mipa kg 100 huangah silver medal la in, Vanramnghaki chuan kg 80 hmeichhe huanga, ding leh vei lam inelha silver medal ve ve la in, Para Women-ah bronze a la bawka a ni.

Pu Lalnghinglova Hmar chuan infiammite tan Sports Incentive Cash Award kalpui dan chu siamthat a nih tur thu a sawi a. Infiamna a chawimawina dawng pha chinte tana pawisa fai lawmman pek thin (Sports Incentive Cash Award) chuan Olympic huanga infiamna chauh huam lovin Olympic sports discipline ni lote pawh telh an nih tawh tur thu a sawi a. Mizoram State Sports Council in association 33 a enkawl mekte pek vek theih dan chu sorkar in a ngaihtuah tih sawiin Olympic discipline ten sorkar atanga lawmpuina an dawn ang za a sawmnga zel Olympic discipline ni lote'n an dawn ve dawn thu a sawi bawka.

Vawiin vek khan Assam Rifles te chuan tun hnaia Mizo thalai pathum Asian Championship-a hlawhtlinna neite chawimawina hun an hmang a, He hunah hian Arm Wrestler pathum te chu 2nd Battalion Assam Rifles Commandant Col. Mukesh Swada chuan lawmpuina leh chawimawina thilpek a pe a, he huna tel ve Peoples Arm Wrestling Federation of India President Jhangaini Preeti chuan thusawiin Arm Wrestling-a Mizo thalaite hmasawna chu hmuh theih khawpa a lan thu a sawi a, Mizo thalaite'n khawvel huap ang pawhin ban-elh-ah hmabak eng tak an nei tih a sawi bawka.

<><><>

ELECTRONIC WASTE

Mizoram Pollution Control Board chuan electric hmang bungraw hlui hlawn tawh te, duh duh dan a theh thang chu sorkar dan kalh a nih thu an sawi.

Mizoram Pollution Control Board Scientist "C" Dr. Lalramnghaki Pachuau chuan electronic waste a telh theih Mobile Phone, TV, Fridge, washing machine leh a dangte chu mihringte bakah thil nung dangte hriselna atana hlauhawm an chan theih avangin bawlhhlawh dangte ang a thehthang mai lova a hranpa a fimkhur taka thehthang a ngaih thu a sawi a, Sorkar laipui pawhin hemi chungchangah hian dan khauh tak a zam thu a sawi bawka.

(byte)

Mizoram Pollution Control Board chuan electronic waste thehthang chungchangah mipuiten fimkhur tak leh uluk zawka heng bawlhhlawh te hi kan thehthang a ngaih thu an sawi a, heng electronic waste-te hi Central Pollution Board-in a, a la khawmtu tura a ruat, anmahni a in register collection center-te hnenah chauh thehthang tur a nih thu sawiin Mizoram-ah pawh collection center pahnih Caro Samba Falkland Aizawl leh Hula Deb Tlangnuam Aizawlah te a awm thu an sawi bawka. Electronic waste recycling ti tute hian Mizoram Pollution Control Board nena tangkawpin mipui zirtirna pawh hmun hrang hrangah an kalpui mek a, anni hian electronic waste hrang hrangte an dawng zel thei a ni.

<><><>

E-RAM PORTAL

Chief Minister Pu Lalduhoma chuan Aizawl district Settlement pisa chu mipuite mamawhna avangin Aizawl North leh Aizawl South ah then a ni dawn a ni, a ti.

Land Revenue & Settlement department awlsam taka mipui-in an dawr theihna tur online service portal, e-ram ti a vuah (Development of Comprehensive & Integrated GIS based System for Maintenance and Management of Land Records in Mizoram portal) a hawna-ah he thu hi sawi-in Pu Lalduhoma chuan ram buai tam takte rang zawka ngaihtuatu tur Revenue Court siam a nih dawn thu leh surveyor indaih lohna avanga mipui harsatna sutkian na'n empanel survey firms system kan kalpui a nih dawn thu a sawi a. He'ng thil tihputlinna tur atan hian sorkarin hriattirna a chhuah tawh thu a sawi bawk a ni.

Chief Minister chuan, sawrkar leh mipuite inkara indawrna awlsam zawk, hun leh tha heh lo zawk, rang zawk leh huapzo zawk neih an duh tih sawiin chu chu kalphung thar mipui sawrkar zia a ni. Sawrkarna an chelh tan ni-ah Right to Public Services Act chu tha zawka kalpui tur leh chumi kaltlanga service tam zawk pe turin an intiam niin a sawi a. Ni za chhungin an tihlawhtling niin a sawi bawk. Mipuite'n an lungawi lohna an thlen zung zungna tur Public Grievances & Redressal portal changkang tak - Mipui Aw thar pawh an hawng bawk tih a sawi a. Hun a lokal leh deuhva, Sustainable Development Goals Dashboard leh Project Monitoring Committee Dashboard an hawng leh a. Vawiinah mipuite dawr nasat em em Revenue hmalakna tichaka tiawlsamtu tur e-ram an hawng leh ta a ni, a ti.

He e-ram portal hi Ministry of DoNER, Science & Technology Section sum cheng vaibelchhe 6 leh nuai 4 atanga thawh niin, a bul tan na'n hian pilot project angin Aizawl district hnuai a ram chhinchhiaha (land records) leh leh thil kal mekte kalpui phawt a ni ang. In hmun dilna, periodical patta, land lease, house site leh hming thlakte a bul tan a ni ang a. A tahtawlin Revenue Department service 27 te chu he portal-ah hian bilh tel vek tura ruahman a ni. A portal address chu eram.mizoram.gov.in a ni a, a hmang thiam lo te tan Common Service Centre (CSC) kal tlanga hman theih a ni dawn a ni.

Land Revenue & Settlement minister Pu B. Lalchhanzova, pawhin thusawiin, he hmalakna hi sorkar hmasa-in bul a lo tan tawh a nih thu leh. An theih ang angin an umzui a, siam that chhoh zel ngai tam tak a la awm ang tih hre chungin an hawng ta phawt a ni, a ti a ni.

<><><>

LIFER

Vawiin khan Kolasib Fast Track Court chuan tualthattu Lalthakima (34) Lungmuat, Kolasib District chu dam chhung lung-ina tang turin a hrem.

November ni 10, 2020 chawhnu dar 1:15 khan Lalrammawia, kum 53 mi chu a chhun mu lai a nau Lalthakima chuan hreipui in a chek a, ka pawh chhawn lovin Lalrammawia hi ama khumah a thi nghal a ni. An unau pahnih hi inngeih lo tak niin, ni dangah pawh an lo inhau in, an intibuai fo tawh thin ni a sawi a ni. He thil thlen lai chiah hi hmutu awm lo mahse, an inchhunga pa ber thuthlengsei a mu zal chuan an thawm ri hi hria-in a harh a, khum lam a'n en chuan a fapa upa zawk chu ama khuma thisen bual zuih khawpa lo awmin a bul maiah a nau chuan hreipui a lo la keng a va hmu a, thil awmzia an han en chian chuan a fapa upa zawk chu a lo thi fel der tawh a ni.

Tualthattu Lalthakima hian Magistrate hma-a a inpuan dan chuan, kha thil thlen ni chawhma lamah khan a u nen an inhau buai a. A u chuan kutte thlakin a hnek a, nimahse an chenpuite'n an thelh avangin intibuai zui zel lovin an awm. Chawhnu herah chuan a u mutna lamah va kalin a u chuan silaia kah a lo tum ni a sawiin an bul mai a hreipui awm chu chuhin a chek ta mai niin a sawi. Tualthattu hi tunah Kolasib District Jail-ah a tang mek a. Judge Pu R.Vanlalena chuan he thubuai hi vawiin khan rel zovin tualthattu Lalthakima chu Lung-ina dam chhung tang turin a hrem ta a ni.

<><><>

HSLC EXAMINATION

Mizoram Board of School Education chuan vawiin khan High School Leaving Certificate (HSLC) exam hun a tichhuak a, nakum February ni 12 atangin exam tan a ni ang.

Mizoram Board of School Education thuchhuah tarlan danin nakum February ni 12 ah practical in bultan a ni dawn a, February ni 19 atangin Theory exam in Mizo leh tawng dang subject exam a ni dawn a, February ni 25 ah English subject exam in February ni 28 ah Science subject an exam dawn a, March ni 5 ah Social Science exam in March ni 11 ah Mathematics an exam ang a, March ni 13 ah Home Science (Theory) Civics & Economics leh Commercial Studies te an exam leh dawn a ni.

HSLC exam hnukung ber kumin khan exam beitu zirlai 18,561 niin zirlai 13,618 in an pass-a. Heng zingah hian Distinction-a pass mi 1,332, I Division-a pass mi 3,801, II Division-a pass mi 5,564 leh III Division-a pass 2,921 an awm a, HSLC exam hnukung berah hian exam pass hmeichhia 7181 awmin mipa 6437 an awm bawk.

<><><>

AIR NEWS ON SOCIALMEWDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

LMC

Lunglei Municipal Council (LMC) Chairman Pu Lalzuithanga hovin vawiin khan LMC huam chhunga trade license nei mumal lova sumdawna tih tawp dan tur sawiho a ni.

LMC huam chhungah LMC chuan sumdawn phalna dilte hnenah a pe chhuak mek zela, phalna (trade licence) nei lote chuan LMC huam chhungah eng sumdawna mah kalpui a thianga lo a ni. Tun dinhmunah foreign leh state dang atangin license nei lova sumdawng an tam hle ni a hriat a ni a. Hei hian tualchhung sumdawna a khawih chhe nasa ni a hriat a ni bawk. He tiang thil tihrem a nih theih na'n hian vawiin khan LMC leh Lunglei Police te chuan hmalak dan tur ruahmanna an siam a ni.

Inkhawmah hian Pu Lalzuithanga, Vice Chairman Pu K. Lalrinawma leh Executive Councillor Pi Lalhruaitluangi Sailo bakah Police department atangin Lunglei SP Pu J. Lalmuankima leh Pu Lalthabuanga ASI te an tel a ni.

<><><>

WINTER SESSION

November ni 25 atanga December ni 20 thleng Parliament thlasik thutkhawm neih a ni dawn. Union Parliamentary Affairs Minister Kiren Rijiju chuan vawiin khan social media ah he thu hi a puang a. Pu Rijijua chuan November ni 26 hi ram danpui pawm anih champha vawi 75-na a nih avangin Samvidhan Sadan Central Hall ah lawmna hun buatsaih a ni ang a ti bawk.

<><><>

PRESIDENT MURMU ON BUDDHISM

President Draupadi Murmu-i chuan India chu Dhamma malsawmna ram anih thu sawiin hunbi tinah hruaitu leh sakhaw enkawltu tha tak tak an chhuak reng a ti.

Vawiina Asian Buddhist Summit, New Delhi-a neihah he thu hi sawiin President Murmu-i chuan Buddha chuan kawngdik zawngtute nunah hmun ril tak a luah a ti a. Budh Gaya thinghnuai Sidhartha Gautama'm tihdanglamna a chan kha khawvel chanchinah thil thleng ropui a ni a ti. Pi Murmu-i chuan khawvelin kil tin atangin buaina a tawng mek tih sawiin Buddhist sakhaw miten mihringte tan thawh theih tam tak an neih thu a sawi a. Asia ram leh khawvel tana remna a thlen theih nan Buddhism pawimawhzia ngaihtuahho a tul a ti a. Buddhism chu remna leh tharum tellohna sakhua a nih thu a sawi bawk a ni.

<><><>